

AWIG – AWIG
DESA PAKRAMAN GUNUNGKANGIN



DESA BANGLI KECAMATAN BATURITI
KABUPATEN TABANAN
WARSA 2003
CAKA 1925

**BANTANG AWIG -AWIG
DESA PAKRAMAN GUNUNGKANGIN**

| | | |
|-------------------------------|---|----|
| | Kaca | |
| MURDHA CITTA..... | | 1 |
| PRATHAMAS SARGAH | ARAN LAN WEWIDANGAN DESA..... | 2 |
| DWITYAS SARGAH | PATITIS LAN PAMIKUKUH..... | 3 |
| TRTIYAS SARGAH | SUKERTAN TATA PAKRAMAN..... | 4 |
| | Palet 1 Indik Krama..... | 4 |
| | Palet 2 Indik Prajuru lan Dulun Desa..... | 7 |
| | Palet 3 Indik Kukul..... | 9 |
| | Palet 4 Indik Paruman..... | 10 |
| | Palet 5 Indik Druwen Desa..... | 12 |
| | Palet 6 Sukertan Pamitegep..... | 13 |
| | Kaping 1 Karang, Tegal, lan Carik..... | 13 |
| | Kaping 2 Pepayonan..... | 14 |
| | Kaping 3 Wewangunan..... | 15 |
| | Kaping 4 Wewalungan..... | 15 |
| | Kaping 5 Bhaya..... | 16 |
| | Kaping 6 Panyanggran Banjar..... | 18 |
| CATURTHAS SARGAH | SUKERTAN TATA AGAMA..... | 19 |
| | Palet 1 Indik Dewa Yajnya..... | 19 |
| | Palet 2 Indik Rsi Yajnya..... | 23 |
| | Palet 3 Indik Pitra Yajnya..... | 23 |
| | Palet 4 Indik Manusa Yajnya..... | 27 |
| | Palet 5 Indik Bhuta Yajnya..... | 28 |
| PANCAMAS SARGAH | SUKERTAN TATA PAWONGAN..... | 30 |
| | Palet 1 Indik Pawiwahan..... | 30 |
| | Palet 2 Indik Nyapihan..... | 30 |
| | Palet 3 Indik Sentana..... | 31 |
| | Palet 4 Indik Warisan..... | 31 |
| SASTHAS SARGAH | WICARA LAN PAMIDANDA..... | 32 |
| | Palet 1 Indik Wicara..... | 32 |
| | Palet 2 Indik Pamidanda..... | 32 |
| SAPTAMAS SARGAH | NGUWAH – UWUHIN AWIG-AWIG..... | 34 |
| ASTAMAS SARGAH | SAMAPTA..... | 35 |
| LAMBANG LAN ARTI LAMBANG..... | | 37 |

MURDDHA CITTA

OM AWIGHNAM ASTU NAMA SIDDHAM

Sembah bakti miwah pangastawan titiang majeng ring paduka Bhatara – Bhatari sesuwunan titiang sami, riantukan wantah malarapan panghyangning kalih pasuecan Ida Sang Hyang Widhi Wasa asung kerthawaranugraha nyresti jagat jangkep rawuhing sadagingnya sami, mawinan wenten kahuripan sekala niskala ring Bhuwana Agung miwah ring Bhuwana Alit. Manut dresta, desane kamanggehang dados pasayuban Krama Desa rawuhing kulawarga pawongannya sami, mawastu raris Desane kamanggehan pinaka pawakan Bhuwana Agung, pawongannya kamanggehang pinaka pawakan Bhuwana Alit.

Sotaning pawakan Bhuwana Agung, Desane taler kamanggahang pinaka pawakan bhawa mahurip, sane kacirenin antuk wentene pakilit Tri Hita Karana sane nenten dados pasahang, luwire :

- ha. Parhyangan, sahanan parhyangan panyiwian Desa, genah ngarcana bhawan Ida Sang Hyang Parama Wisesa, pinaka jiwana Desane ;
- na. Pawongan, gebogan Krama saha warga Desa maka sami pinaka bayu pramanan Desane, mawinan Desane prasida maolah prawreti ;
- ca. Palemahan, sahananing tanah kekuwuban wewidangan Desa, pinaka stulan Desane.

Adung patemoning Bhuwana Agung ring Bhuwana Alit, maka larapan ngupadi santa jagadhita punika sinanggeh murddhaning prayojana pangriptaning awig-awig iki, rikala paseban mami Desa Pakraman Gunung kangin pinaka, sepat siku-siku pamatut miwah pamutus wastu kasidan prayojanan mami kabeh, prasama angidep muwah amageh aken linging awig-awig kadi ring sor iki.

PRATHAMAS SARGAH

ARAN LAN WEWIDANGAN DESA

Pawos 1

1. Desa Pakraman puniki mawasta Desa Pakraman Gunungkangin
2. Jebar kekuwub wewidangannya mawates nyatur desa :
 - ha. Sisi wetan (Kangin) Tukad Yeh Sungai
 - na. Sisi kidul (Kelod) Desa Pakraman Umepoh
 - ca. Sisi kulon (Kauh) Desa Pakraman Bangli
 - ra. Sisi lor (Kaler) Desa Pakraman Baturiti
3. Jebar kekuwub wewidangan sane kawengku antuk wates-wates inucap wenten :
133.018 Ha.
4. Sane kamanggehang ngranjing dados kekuwub wewidangan Desa Pakraman puniki, manut dresta, luwire :
 - ha. Pupulan karang paumahan sane sinanggeh palemahan Desa Pakraman
 - na. Setra, carik, miwah tegal sane wenten ring kekuwub wewidangan Desa Pakraman puniki sajabaning palemahan Desa Pakraman, manggeh ngranjing dados tlajakan Desa Pakraman Gunungkangin.
5. Desa Pakraman puniki wantah kawangun antuk 1 (siki) banjar, inggih punika Banjar / Desa Pakraman Gunungkangin.
6. Awig-awig, pararem miwah sahanan Pasuaran Desa, manggeh kajejerang ring jebar kekuwub wewidangan Desa Pakraman puniki sami.

DWITIYAS SARGAH
PATITIS LAN PAMIKUKUH

Pawos 2

Desa Pakraman Gunungkangin ngamanggehang pamikukuh, minakadi :

1. Pancasila
2. Undang-Undang Dasar 1945, pamekas pasal 18
3. Tri Hita Karana, manut sadacara Agama Hindu.
4. Hak Asasi Manusia (HAM).
5. Perda propinsi Bali indik Desa Pakraman .

Pawos 3

Luwir patitis Desa Pakraman Gunungkangin inggih punika :

1. Mikukuhin miwah ngrajegang Sang Hyang Agama.
2. Nginggilang tata prawretine maagama.
3. Ngrajegang kasukertan Desa saha Pawongannya sekala lan niskala.

TRTIYAS SARGAH
SUKERTAN TATA PAKRAMAN

PALET 1

Indik Krama

Pawos 4

1. Sahananing sang jenek mapaumahan ring wewengkon wewidangan Desa Pakraman Gunungkangin sinanggeh warga Desa.
2. Warga Desa inucap ring ajeng, linggihnyane wenten 3 (kalih) soroh :
 - ha. Warga Desa sane maagama Hindu tur sareng nyungkemin kahyangan Desa Pakraman Gunungkangin sinaggeh Krama Desa Pakraman Gunungkangin.
 - na. Sajaba punika, sinanggeh krama tamiu, sane kasulurang manut pararem.

ca. Tamiu kasulurang manut pararem

Pawos 5

Dasar Pakraman :

1. Sahanan Warga Desa Pakraman Gunungkangin sane sampun marabian, patut ngawit dados Krama Desa.
2. Satunggil Krama, manut karendahan kulawargannya, patut keni sinalih tunggil ayah-ayah :
 - ha. Ayahan Ngarep.
 - na. Ayahan Balu.
3. Sasengker ngawit tedun ngayah :
 - ha. Marep ring krama Desa sane mawit saking pawiwahan, ngawit saking puput makala-kalan.
 - na. Marep ring Krama Desa sane mawit saking ngarangin, kapatutang keni ayah-ayah ngarep, kasulurang manut pararem.
4. Krama Desa sane wenang nyada yan sampun kapastika, luwire :
 - ha. Sungkan tahunan.
 - na. Yan sampun maderbe pangentos utawi penyeledi.
 - ca. Risampun mayusa 70 warsa.

5. Sang saking sewosan desa yan sareng tedun makrama desa ring Desa Pakraman Gunungkangin patut keni batu-batu utawi pamogpog, sane agengnya kasulurang manut pararem
6. Yening wenten krama saking sewosan desa sareng ngranjing makrama desa ring Desa Pakraman Gunungkangin patut kadulurin antuk surat katerangan sane jangkep.

Pawos 6

Wusan dados krama Desa, luwire :

1. Sangkaning :
 - ha. Seda ;
 - na. Pinunas ngraga, manawi magingsir linggih saking wewengkon Desa Pakraman Gunungkangin.
 - ca. Kanorayang, malantaran piwal ring awig-awig miwah pararem Krama Desa, utawi tan satinut ring pituduh prajuru sajeroning indik nyupat sikian, minakadi nenten prasida ngesehin prawreti :
2. Sang wusan dados krama desa tan polih pahpahan druwen Desa sawawaning pahpahan sane mawit saking utsahan Banjar, miwah tan polih pasayuban malih sajeroning ala ayu.

Pawos 7

Sahanan Krama Desa, patut keni tetegenan utawi ayah-ayah, luwire :

1. Ayahan ngarep, mapiteges paturunan miwah ayahan memungkul saking krama ngarep
2. Ayahan Balu, luwire :
 - ha. Balu remben sane pianaknyane kantong alit-alit, punika keni ayahan balu remben sane kasulurang manut pararem.
 - na. Balu ngelintik, keni ayah-ayah balu manut balunnyane, yan lanang keni ayahan lanang, yan istri keni ayahan istri.

3. Ritatkala ngardi wewangunan kabuatan Desa Pakraman, Kramane sajabana keni ayahan manut pawos 7, taler keni paturunan sakadi ring sor :
 - ha. Paturunan samawibhaga manut pararem.
 - na. Dana punia, manut kalascaryan sang madana punia
4. Krama Desa, kadadosang :
 - ha. Mapuankid utawi tan tedun ngayah / parum :
 1. Rikala mapawangunan, ngraabin, nangun yajnya, nandur kaluwasan masengker dewasa :
 2. Keni dedawuhan saking guru Wisesa;
 3. Kapialang luwire : sungkanmatepetin, kalayusekaran, lan sakancan punika.
 - na. Dados ngwakilang ring jadma tiosan, sane sampun menek daa / teruna.
 - ca. Dados mogpog utawi numbas ayahan, prade :
 1. Dados Pegawai Negeri utawi Pegawai Perusahaan Swasta.
 2. Magenah ring desa sewosan malantaran ngrereh pakaryan.
 3. Indik pamogpog kasulurang manut pararem.
 - ra. Dados nyeledii utawi nyuksukin krama ngarep yan sampun mayusa 17 warsa

Pawos 8

Kapatutan Krama Tamiu

1. Krama Tamiu, patut madana punia ring Desa Pakraman Gunungkangin, manut pararem
2. Krama Tamiu, patut polih pasayuban marupa pitulung rikenjekan katiben pancabhaya.

Pawos 9

Paturunan miwah Leluputan

1. Paturunan utawi peson-peson sajeroning ngulati kasukertan Desa Pakraman Gunungkangin, kapitegenang ring Krama Desa / Banjar.

2. Desa Pakraman, maweh leluputan ayah-ayah miwah peson-peson ring sang inggiling linggih miwah sang kawelasarsan.
3. Sor singgih leluputan miwah bacakan sang polih leluputan, kaunggahang jeroning pararem.
4. Sajawaning prajuru Desa / Banjar, sane taler polih leluputan, luwire :
 - ha. Para sadhaka, minakadi Pamangku Kahyangan / Penyiwian Desa, lan panyade manut pararem.
 - na. Para serati lan sutri.
 - ca. Sang sungkan tahunan.
 - ra. Wong cedangga banget.
 - ka. Wong ubuh meme bapa, jantos merabian utawi jantos mayuse 25 warsa.

Palet 2

Indik Prajuru Lan Dulun Desa

Pawos 10

1. Desa Pakraman Gunungkangin kaenter antuk Prajuru Desa Pakraman, kamanggala antuk Bendesa Adat.
2. Prajuru Desa Pakraman, patut :
 - ha. Mawit saking Krama Ngarep utawi pangele ;
 - na. Kaadegang Prajuru malantaran antuk pamilihan jeroning paruman Krama Desa / Banjar, nyabran 5 (limang) warsa, sajawaning wenten parindikan tios, tur sang sampun puputing panumaya, kengin kapilih malih;
 - ca. Maduluran atur piuning ring Pura Desa.

Pawos 11

1. Bendesa Adat, karombo antuk :
 - ha. Panyade, pinaka wakil Bendesa Adat.
 - na. Panyarikan, pinaka juru surat.

- ca. Patengen, pinaka pangemong Druwen Desa.
 - ra. Kasinoman, pinaka juru gumencang.
2. Sajeroning ngenterang kasukertan, kaniskala, Bendesa Adat, patut misinggihang Pamangku Kahyangan Desa
 3. Prajuru Desa taler ngadegang Dulun Desa utawi panglinsir, sane sinanggeh Kerta Desa, mawit saking Prajuru sane sampun puputing panumaya, sang wikan ring adat miwah agama, Kepala Desa miwah sane lianan, sane kasulurang manut pararem.

Pawos 12

1. Swadharmaning Bendesa Adat, luwire :
 - ha. Ngenterang paruman-paruman Desa / Banjar.
 - na. Ngenterang panglaksanaan sadaging awig-awig miwah, pamutus-pamutus Krama Desa / Banjar, sane sinanggeh Pararem.
 - ca. Ngraksa miwah nudonang tata-titine migunayang sarajabrana druwen Desa.
 - ra. Nuntun saha ngenterang Krama Desa rawuhing Warga Desa sami, ngupadi kasukertan sekala lan niskala.
 - ka. Nuntun saha nyaksi upacara sangskaraning kahuripan sane mabuat, minakadi sane ngilitang sulur pakulawargan.
 - da. Nuntun saha ngenterang Warga Desa nginggilang Sang Hyang Agama, kasucian kahyangan, kasucian palemahan, kasucian pawongan miwah tata-titine migunayang setra.
 - ta. Mawosin miwah niwakang pamutus marep ring wicaran Warga Desa.
 - sa. Ngwakilin Desa / Banjar, matemuang bebawos ring sapa sira ugi.
 - wa. Lan sane sewosan sane wenten pakilitnyane ring Desa / Banjar
2. Tata-titine nglaksanayang swadharma inucap ring ajeng, tan maren patut satinut ring daging awig-awig, pararem, dresta, miwah pamutus paruman Desa / Banjar.
3. Panglaksanane ring ajeng patut kasiarang ring Desa / Banjar kapungkuripun.
4. Sumakuta utawi sumanggup natak pamutus paruman Desa / Banjar, ngeninin swadharman sowang-sowang prajuru.

Pawos 13

Patias utawi olih-olihan Prajuru / Dulun Desa, luwire :

- ha. Luput reramon utawi peson-peson.
- na. Luput paturunan marep ring kabuatan Desa / Banjar.
- ca. Polih kalih tanding
- ra. Patias sewosan manut pararem.

Pawos 14

1. Prajuru / Dulun Desa, kapilih nyabran 5 warsa, ngawit saking padiwasane kaadegang Prajuru / Dulun Desa.
2. Prajuru / Dulun Desa sane swadharmannya sampun puputing senger, kengin kapilih malih.
3. Pari indikane ngadegang Prajuru / Dulun Desa sakaluwire, kapastikayang malarapan paruman Krama Desa tur kaingkupin antuk Krama.
4. Wusan dados Prajuru / Dulun Desa, sangkaning :
 - ha. Lina;
 - na. Pinunas ngraga malantaran jalaran sane pastika;
 - ca. Swadharmannya sampun puputing senger;
 - ra. Kawusanang / kanorayang olih Krama Desa duaning iwang pamargi, menawi nilar sesana.
5. Ngentosin, ngwusanang utawi nganorayang Prajuru / Dulun Desa, patut kamargiang sajeroning Paruman Krama Desa tur kaingkupin antuk Krama Desa.

Palet 3

Indik Kukul

Pawos 15

1. Dudonan kukul ring Desa Pakraman Gunungkangin, luwire :
 - ha. Kukul Desa.

- na. Kukul Banjar.
 - ca. Kukul sekaa-sekaa.
2. Kukul Desa / Banjar, kamanggehang pinaka piranti utawi sarana tengeran maka wangsit, ring wewengkon wewidangan Desa / Banjar.
 3. Tetepakan suaran kukul manut dresta, tur anggah-ungguh tetepakanipun kaunggehang jeroning pararem.

Pawos 16

1. Kukul Desa / Banjar, tan wenang katepak yang tan sangkaning pituduh Prajuru, sajawaning tengeran kapancabhayan.
2. Sang nepak kukul Desa / Banjar, tan sangkaning pituduh prajuru, patut digelis atur supeksa maka buatan panepake : yan piwal, sang mamurug wenang katibakin danda, manut pararem.
3. Kukul sekaa-sekaa miwah kukul pondokan-pondokan, tan kalugra nyawerin, utawi matchin sukat miwah tetepakan kukul Desa / Banjar : prade mamurug, sang mamurug taler wenang katibakin danda, manut pararem.

Palet 4

Indik Paruman

Pawos 17

1. Dudonang Paruman ring Desa Pakraman Gunungkangin, luwire :
 - ha. Paruman Krama Desa, kawentenang sanistannya apisan sajeroning awarsa utawi manut kabuatan, sane karihinin antuk tetibak arah-arah.
 - na. Paruman Padgatakala, rehning wenten indik sane dahat mabuat sane pacang kabawosang, sane karihinin antuk tetibak arah-arah.
 - ca. Paruman Prajuru / Dulun Desa, kawentenang manut kabuatan
 - ra. Paruman Sekaa-sekaa, kawentenang manut kabuatan.
2. Pamargin Paruman Krama Desa / Banjar, patut nganutin dudonan :

- ha. Paruman Wahu kengin kakawitin sesampune katedunin antuk pinih kedik pah kalih lintang asiki lintang saking sang patut ngamiletin, kamanggala antuk tengeran suaran kulkul, mabusana adat bali, tan kalugra makta gegawan sakaluwire, karihinin antuk ngarcana Bhagawan Panyarikan majalaran widhi widhana lan cane.
 - na. Maka pangawit, kalaksanayang panyacak pangasep, karuntutin antuk nyacak dedosan, wahu kalanturang antuk parum ; sesampun parumane puput, patut kacacak malih, tur sane kasep, sang ninggal paruman miwah sane nosa, wenang katibakin danda, sane ageng alit ipun kasulurang manut pararem.
 - ca. Maka pamastika wahu kengin nyacak pangasep, kasulurang manut pararem.
 - ra. Sajeroning paruman tan kalugra ngwetuang wak ghora minakadi ngardi biota ; sang mamurug, wenang keni pamidanda bea pecamil, sakadi dandaning anguman-nguman ring paseban, sane kasulurang manut pararem.
 - ka. Pamutus bebawos sane briuk sapanggul utawi ingkup, punika sane kaaptiang tur kamanggehang.
3. Prade daging peparumane nenten kaingkupin, Prajuru Desa / Banjar mangda ngilikang bebawos saha pamutusnya mangda kararemin antuk Krama Desa / Banjar bilih jantos ping tiga taler nenten prasida kaingkupin Prajuru Desa / Banjar dados nunas bawos ring kerta Desa nganutin dudonan : kaingkupang paiguman Prajuru, Kaingkupang paguman Kerta Desa, pinih untat , malih katunasang pamutus sajeroning Paruman Krama Desa / Banjar.

Pawos 18

- 1. Sajeroning Paruman Krama Desa, Bendesa Adat patut nyiarang pamargine ngenterang Desa, pamekas ngenenin indik :
 - ha. Munjuk lungsuring gebogan pakraman saha ayah-ayahannyane, minakadi sulur arthabrana druwen Desa.
 - na. Pangrencanan Prajuru, ngenenin utsahan Desane kapungkur
- 2. Pamutus Paruman Krama Desa sane sinanggeh Pararem, kamanggehang maka pamitegep panglaksanaan awig-awig.

Pawos 19

1. Paruman Prajuru / Dulun Desa, kawenangang wantah ngrincikang pangrencana marep ring utsahan Desane kapungkur.
2. Paruman Prajuru Desa, tan kawenangang ngamedalang tetegenan ring Krama Desa, saderenge kaingkupin antuk krama Desa.
3. Pamutus Paruman Prajuru / Dulun Desa, kengin ngwetuang pasuara manut daging pituduh sang ngawa rat, utawi ngonekang pamutus sane pecak sampun dados Pararem Krama Desa.

Palet 5

Indik Druwen Desa

Pawos 20

1. Sane kamanggehang dados druwen Desa Pakraman Gunungkangin :
 - ha. Kahyangan Desa, luwire :
 1. Kahyangan Tiga : Pura Desa, Pura Puseh, Pura Dalem.
 2. Kahyangan druwen Desa sewosan ring Kahyangan Tiga, minakadi :
Mrajapati, Palinggih Bale Banjar,
 - na. Bale Banjar
 - ca. tanah Tegalan : **1,11** Ha.
 - ra. Setra : **0.53** Ha.
 - ka. Palaba Pura marupa carik : **1.305** Ha.
 - da. Niasa lan Sesanti ;
 - ta. Lelangwan, minakadi tetabuhan lan ilen-ilen druwen Desa, luire :
 1. Gong Banjar sane sinaggeh druwen Banjar / Desa Pakraman.
 2. Ilen-ilen wali ring pura : Rejang, Pendet.
 3. Lekita-lekita : pipil utawi sertifikat, awig-awig, pasuara, pararem Desa Pakraman Gunungkangin
 4. Palawatan Ida Bhatara.
 - sa. LPD Desa Pakraman Gunungkangin

2. Olih-olihan Desa Pakraman Gunungkangin mawit saking :
 - ha. Upon-upon palaba Pura :
 - na. Paturunan saking Krama Desa.
 - ca. Paica saking Guru Wisesa (Pemerintah).
 - ra. Dana punia tiyosan sane patut.
3. Sanangken paruman Krama Desa, Bendesa Adat Patut nyiarang munjuk lungsur – lungsur upon-upon laba pura lan sapanunggalannya sane sinanggeh druwen Desa.
4. Upon-upon pelaba Pura lan sapanunggalannya, kanggen prabea piodalan miwah wewangunan ring pura, taler prabea tiosan marep ring kabuatan Desa Pakraman.
5. Sakaluwiring druwen Desa patut wenten lekitannya sane pastika.
6. Tan kalugra ngadol utawi ngesahang druwen Desa yan tan kacumponin antuk Krama Desa sami.

Palet 6

Sukerta Pamitegep

Kaping 1

Karang, Tegal, lan Carik

Pawos 21

- 1) Krama Desa sane ngamong karang Desa utawi karang paumahan ngraga, patut ngwatesin karangnya sowang-sowang antuk pagehan/turus utawi tembok, mangda pakantenannya asri.
- 2) Watese sane mawasta gegaleng kaluan miwah gegaleng kateben mangda nganutin dresta, tur kakaryanin olih sang negen wates inucap.
- 3) Prade karasayang pagehan/turus inucap nglikadin, yan pada arsa panyandinge, watese kengin nganggen pinget utawi prachina pal saking Agraria, sakewanten kasaksi antuk Prajuru Desa / Banjar.
- 4) Prade wenten karang kabebeng, mangda kautsahayang wenten pamesuannyane sane pastika.

Pawos 22

- 1) Sinalih tunggil Krama Desa/ Krama Banjar, nenten kalugra :
 - ha. Ngalah-alah margi, karang Desa, tegal ayahan Desa, tegal/carik Krama lian, lan sakancan punika;
 - na. Ngalah-alah tegak Kahyangan, Setra, lan sakancan tegak sane sinaggeh suci.
- 2) Prade wenten mamurug kecape ring ajeng, sang mamurug, patut ngwaliang tanah inucap, tur sang ngalah-alah tegak suci, tiosan ring ngwaliang tanah tegak suci inucap, taler patut karuntutin antuk dewa danda miwah artha danda, dewa danda minakadi guru piduka, artha danda manut pararem.

Kaping 2

Pepayonan

Pawos 23

1. Ngawit nandur pepayonan minakadi tanem tuwuh, patut ngangge sepat adepa agung ngajeroang saking wates : pepayonan minakadi tanem tuwuh sane jantos ngliwat wates wenang kasepatgantungin.
2. Pepayonan sane ngungkulin mawastu mayanin kapisaga, sang nruwenang pepayonan inucap patut kawara tur kairing mapiguman antuk sang rumasa katetehan, bilih-bilih sang nruwenang, arsa ngrebah utawi notor wit pepayonane punika.
3. Pradene sampun kawara taler tan wenten utsahan sang nruwenang, sang rumasa katetehin wenang masadok ring prajuru, tur risampune kaparitasas kandugi wenten lelugrahan Prajuru, wahu wit pepayonane punika kengin karebah, wit pepayonane sane karebah punika, kadruwenang sareng kalih.
4. Sang keni pamidanda penyangaskara saha prabya marep ring wewangunan sang karubuhan luire :
 - ha. Sang nruwenang wit pepayonan sane sinaggeh mayanin, pradene pungkut tur ngrubuhin wewangunan krama tiosan.

- na. Sang notor, monggol utawi ngrebah taru tur ngrubuhin wewangunan krama tiosan, makehnya agung, wewangunan rawuh sepuput ipun.
5. Krama Desa patut ngemanggehang kawredian tanem tuwuh sane ngawinang Desane asri tur lestari sane kawastanin Bhuta Hita, sane matesges kalestarian lingkungan hidup.
 6. Sinalih tunggil Krama sane pacang ngrebah pepayonan minakadi tanem tuwuh sane ngawinang Desane asri tur lestari, patut masadok ring prajuru.

Kaping 3

Wewangunan

Pawos 24

1. Nyabran ngewangun, sowang-sowang Krama Desa patut :
 - ha. Masadok ring Prajuru, pamekas marep ring wewangunan sane mapanyaitan minakadi menengin wates ;
 - na. Ngangge Asta Bhumi miwah gegulak Asta Kosali, sanistanya manut ring patitise ka niskala.
2. Prade wewangunane jantos nyayubin ka pisaga, bilih-bilih temboke ring telenging wates, risampune kawara tur kairing mapiguman taler tan wenten utsahan sang nruwenang, kangkat kasadokang ring Prajuru ; sesampune kaparitas tur wenten lelugrahan Prajuru, sang nruwenang wenang kadanda manut pararem tur tembok inucap patut kagubar olih sang nruwenang, sanistannya mangda kakaryanang abangan.

Kaping 4

Wewalungan

Pawos 25

1. Sahanan Warga Desa sane miara wewalungan : bawi, banteng, miwah sane lianan, mangda sayaga nitenin negul minakadi nglogor wewalungannya, mangda nenten ngrusak karang utawi pabianan Krama tiosan, bilih-bilih jantos ngranjing ngletehin kahyangan.

2. Prade wenten wewalungan malumbar utawi ngeleb tur ngrusak karang utawi pabian Krama sewosan, risampune kawara taler nenten wenten utsahan sang nruwenang , yan wewalungan punika malih ngrusak karang utawi pabianan Krama sewosan, wewalungan inucap kengin kataban, tur sang nruwenang wenang katibakin danda ngwaliang panukun wit tetanduran sane karusak, saha panebas pepiaran tetabanan, manut panglokikan Prajuru Desa.
3. Prade wenten wewalungan ngranjing jantos ngletehin genah suci, minakadi kahyangan, pamrajan lan sakancan punika, risampune kaparitas antuk Prajuru, sang nruwenang wewalungan inucap wenang keni dewa danda lan artha danda, agung alit ipun manut kecap sastra agama, sane kapikukuh antuk Krama Desa.
4. Krama Desa patut nyerayanin wewalungan miwah sarwa prani, tan kapatut mademang paksi, nuba ulam lan sakancan punika, pinaka sinalih tunggil utsahan Krama Desa ngardi Bhuta Hita.
5. sang mamurug kecape ring ajeng, wenang keni danda manut pararem.

Kaping 5

B h a y a

Pawos 26

1. Bacakan bhaya luwire jiwabhaya, arthabhaya, agnibhaya, toyabhaya, hindubhaya, lan sekancan punika, sane ketahipun kawastanin pancabhaya.
2. Sinalih tunggil Krama sane manggihin prasihna pastika wentene sahanan pancabhaya, patut digelis nepak kulkul tengeran kapancabhayan, tur digelis masadok ring Prajuru.
3. Prade Desane sane kahanan jiwabhaya, Krama Desane patut ngaturang upacara pamahayun Desa manut kecap sastra agama sane kapikukuh antuk Krama Desa, tur sang ngwetuang jiwabhaya katur ring sang ngawewenang.

Pawos 27

1. Sinalih tunggil Krama sane manggihin prasihna pastika wentene arthabhaya (kamalingan), patut digelis nepak kulkul tengeran pamitulung manut pawos 15 (4), utawi pawos 16 (1) ; sang kamalingan patut atur supeksa ring Prajuru; sang kacihnan ngamaling, katur ring sang ngawewenang, maweweh malih patut keni dewa danda lan Artha danda manut Pararem lan ngwaliang barang sane kapandung (kamaling).
2. Sowang-sowang Krama Desa tan kapatut mapailonan ring dusta; sang kacihnan mapailonan ring dusta patut katibakin danda kadi dandaning maling sane kasulurang manut pararem.
3. Indik ngereh reramon minakadi daun kelapa, ron, miwah sane sewosan ring pabianan krama tiosan ri kenjekan suwung, keni artha danda manut pangargan barang sane kapandung tur ngwaliang barang sane kapandung , yan ipun kacihnan ngamaling.
4. Yening wenten jadma ngranjingin pakubon wiadin pakarangan Krama sewosan rikala suwung tur tan pawangsit, mawastu sang madruwe karang kaicalan, wenang jadma inucap kacorok mamaling saha patut madewa saksi ring Pura Desa utawi Bale Agung.
5. Mangda tan kasinanggeh manut kecape ring ajeng asing-asing ngranjingin pakubon jadma sios patut :
 - ha. Matengeran suara.
 - na. Nyantos sang nruwenang karang rauh utawi masadok ring panyanding pinih tampek, makabuatan pangranjinge.
 - ca. Pamedal sang maderbe karang kedagingin sawen maka cihna wenten pangarah rikala suwung.

Kaping 6
Panyanggran Banjar
Pawos 28

1. Krama Banjar ring sawewengkon Desa Pakraman Gunungkangin patut sareng nyanggra karya suka dukan sowang-sowang Krama Banjar.
2. Tetibak panyanggrane inucap ring ajeng, kasulurang manut pararem.
3. Sowang-sowang Krama Banjar sane pacang nangun karya suka-duka sane mabuat, mangda masadok ring prajuru.

CATURTHAS SARGAH
SUKERTAN TATA AGAMA

Palet 1

Indik Dewa Yajnya

Pawos 29

1. Kahyangan-kahyangan panyiwian Krama Desa Pakraman Gunungkangin :
 - ha. Kahyangan Tiga : **Pura Desa / Bale Agung, Pura Puseh, Pura Dalem.**
 - na. Kahyangan-kahyangan panyiwian Krama Desa tiosan ring Kahyangan Tiga :
Mrajapati, Pura Bukit Melingkuh, Pelinggih Bale Banjar, Pura Bukit Pengangon
2. Tegak piodalan ring sowang-sowang kahyangan inucap ring ajeng kamanggehang sakadi ring sor puniki :
 - ha. **Pura Desa/ Bale Agung ring rahina Anggarkasih Julungwangi.**
 - na. **Pura Puseh ring rahina Buda Manis Julungwangi.**
 - ca. **Pura Dalem ring rahina Buda Wage Warigadian.**
 - ra. **Pura Mrajapati ring rahina Bude Wage Warigadean**
 - ka. **Pura Bukit Melingkuh rikala Purnama Kadasa.**
 - da. **Pura Bukit Pangangon rikala Saniscara Kliwon Uye.**
 - ta. **Palinggih Bale Banjar ring rahina Tumpek Wariga.**
3. Pamargin pangacine ring sowang-sowang kahyangan inucap ring ajeng manut kecap sastra agama, saha kalaksanayang kanista, madhyama, utama, manut kawentenan krama sane kaingkupin jeroning pararem.

Pawos 30

1. Ring sowang-sowang pura inucap ring ajeng, patut kaadegang Pamangku.
2. Pidabdabe ngadegang Pamangku, nganutin dudonan :
 - ha. Ngawilang saking turunan utawi ngwaris.
 - na. Malantaran nyanjan utawi nuhur ring pura sane karerehang Pamangku.

- ca. Malantaran kapilih antuk Krama Desa.
- 3. Sang tan wenang kaadegang dados Pamangku, luwire :
 - ha. Cedangga, luwire : peceng, perot, cungh, lan sapanunggilannya.
 - na. Nandang sakit ila, ayan, buduh miwah pinungkan sane tan keneng tinamban.
 - ca. Sang maderbe parilaksana nenten becik.
- 4. Prabea Kapamangkuan :
 - ha. Prabean Upakara/upacara adiksa widhi utawi ngwintenang Pamangku, kamedalin miwah kalaksanayang antuk Krama Desa.
 - na. Marep ring prabean Pitra Yajnya ring Pamangku, Panyade, Serati, Sutri, yan seda ri wekas, Krama Desane patut maweh dana punia atiwa-atiwa, manut pararem.
- 5. Pamangku, patut ngamanggehang sesana miwah agem-ageman Pamangku.

Pawos 31

Swadharmaning Pamangku, luwire :

- ha. Ngenterang upacara piodalan ring Kahyangan sane kaempon utawi ring pakubon sowang-sowang Krama.
- na. Prade sinalih tunggil Pamangku Kahyangan Desa kapialang utawi cuntaka, kengin nyelang Pamangku Kahyangan Desa tiosan, utawi nuhur sang Sulinggih, katitenin antuk Prajuru .
- ca. Yan Pamangku kalayusakaran, wenang anglepas swadharma, kasulurang manut pararem.
- ra. Yan Pamangku sampun tigang rahina ngayah ring pura sane kaempon, kancit wenten kulawargannya kalayusakaran, Pamangku inucap tan keneng cuntaka, sakewanten nenten kengin budal salamin piodalan.
- ka. Munggah tedun ring palinggih-palinggih Kahyangan Desa miwah ngiyasin pralingga-pralingga, manut pamastikan Prajuru.
- da. Ngrajegang sesanan Pamangku.

Pawos 32

Patias utawi olih-olihan Pamangku, luwire :

- ha. Panyolasan miwah sarin canang rikala muput nyajnya ring sowang-sowang pakubon Krama.
- na. luput pakaryan miwah reramon.
- ca. Polih sarin canang rikala wenten aci ring Kahyangan sane kaemponin manut pararem.

Pawos 33

1. Pamangku kagentosin, riantukan :

- ha. Seda.
- na. Pinunas ngeraga, menawi kageringan lan sapanunggilannya.
- ca. kawusanang antuk Krama, riantukan nilar sesanan Pamangku.

2. Tata carane ngadegang miwah ngentosin Pamangku, kasulurang manut pararem

Pawos 34

Indik Kasukertan Kahyangan, kadudonang sakadi ring sor puniki :

1. Sane nenten kalugra ngranjing ka Pura, luwire :

ha. Sang katiban cuntaka, minakadi sebel ngeraga :

- 1) Sebel kandel Ngerajasewala, salami dereng mabersih.
- 2) Sebel antuk ngembasang putra, salami 42 rahina, pateh ring sang karuron.
- 3) Sebel pangantenang; sadereng mabiakala utawi makala-kalan.
- 4) Sebel riantukan kalayusakaran, jantos puputing sengker sane kaingkupin jeroning pararem

na. Makta sahananing bebaktan sane sinanggeh ngletehin, manut kecap sastra agama.

ca. Sato Agung minakadi wewalungan suku pat, sajawaning rikala mapepada.

ra. Anak alit sadereng mayusa tigang sasih.

- ka. Mabusane sane tan manut kadi tatacaraning ngeranjing ka Pura. Sadereng polih wak-wakan utawi pituduh saking Prajuru Desa.
 - da. Sang panten miwah anak bebinjat sadereng maupakara.
2. Tata busana ngranjing ka Pura wenang nganutin dresta minakadi :
 - ha. Ritatkala ngaturang ayah mawastra lan nyelempot.
 - na. Ritatkala ngaturang sembah mabusana jangkep.
 - ca. Siosan kadi ring ajeng nenten kalugra sajabaning sampun polih pituduh Prajuru.
 3. Pratingkahe tan wenang ring pura, luwire :
 - ha. Masumpah utawi macoran, sajawaning pituduh Prajuru Desa.
 - na. Ngamedalang wak parusya utawi wak capala.
 - ca. Mabanyu, makoratan, masesenengan, makolem, dados asiki lanang wadon, nyangsang busana.
 - ra. Ngias raga minakadi menahang wastra, menahang papusungan lan sekancan punika, sajawaning sang Sulinggih miwah Pinandita.
 4. Sewosan ring Pamangku tan kalugra munggah tedun ring palinggih-palinggih, sajawaning wit saking pituduh Prajuru Desa.
 5. Sang mamurug kecape ring ajeng, wenang keni dewa danda, keni pamrayascitta sapatutnyane.

Pawos 35

1. Yan wenten jadma karawuhan ring Pura, boya saking nyanjan tur ngawinang Kramane biapara, wenang keni pamrayascitta sapatutnyane.
2. Prade Kahyangan Desane kahanan durmanggala minakadi kapancabhahayan Pamangku patut digelis masadok ring Prajuru Desa
3. Indik Upakara/ Upacara pamahayun kadurmanggalan Kahyangan Desa, mapagamel kecap sastra agama, sane kasungkemin olih Krama Desa

Palet 2
Indik Resi Yajnya

Pawos 36

1. Sang Pacang madeg sulinggih utawi madwijati patut masadok ring Prajuru Desa miwah Parisadha Hindu Dharma Indonesia.
2. Prajuru Desa patut ngawas lan nitenin tur wenang mialangin, prade kacihsan wenten indik sane tan manut kecap sastra agama, tur sareng nyaksi upakara/upacaran padwijatiannya, saha nglantur nyiarang jeroning paruman Krama desa tegep rawuhing wates kawenangannya muput Yajnya.
3. Krama Desa patut madana punia sapadeg miwah ring panglepas Sang Sulinggih riwekas, katuntun antuk Prajuru Desa.
4. Sang Sulinggih wenang polih leluputan ayahan miwah peson-esonan

Pawos 37

1. Sajeroning muput Yajnya, sang sulinggih patut ngutamayang muput Yajnya ring wewengkon Desa Pakraman Gunungkangin, sesampune puput, wahu muput Yajnya ring wewengkon Desa tiosan utawi kadura Desa.
2. Krama Desane sami, patut sareng ngawas lan nitenin katuntun antuk prajuru mangda sahanan Yajnya sane kalaksanayang olih sowang-sowang Krama Desa kapuput olih Sulinggih utawi Pinandita tur kasulurang antuk sang manyajnya sakadi patut ipun.

Palet 3
Indik Pitra Nyajnya

Pawos 38

1. Desa Pakraman Gunungkangin patut sareng nyanggra yan wenten sinalih tunggil Krama sane nglaksanayang pitra Yajnya.
2. Tatacara panyanggrane inucap ring ajeng kasulurang manut pararem.

3. Dudonan pamargin pitra nyajnya :
 - ha. Majalaran mendem utawi ngeseng, maka cihna makingsan ring pratiwi utawi makingsan ring geni, pinaka dharana antos nuptupang prabea.
 - na. Majalaran upacara pangabenan utawi palebon .
 - ca. Riwusan ngaben, patut kalanturang malih antuk upacara mamukur tur karuntutin malih antuk nglinggihang Dewa Pitara.

Pawos 39

1. Sinalih tunggil Krama sane kalayu sekaran/ atiwa-atiwa, mangda masadok ring Prajuru.
2. Swadharmaning Desa / banjar :
 - ha. Kelihan Banjar / Adat patut maritatas sang kaduhkitan, napike pacang kapendem, makingsan ring geni, utawi lantur kaabenang.
 - na. Prade kapendem, raris kawentenang panepak kul-kul tengeran kalayusekaran.
 - ca. Panyanggran Krama Banjar salanturnya manut sakadi sane sampun kaunggahang jeroning pararem, jantos pependemane puput.
 - ra. Prade makingsan ring geni, panyanggran Krama banjar salanturnya, manut kadi daging pararem, jantos pamargin upacarane puput.
 - ka. Prade kaabenang, panyanggran Krama Banjar salanturnya, manut kadi daging pararem, jantos pamargin upacarane puput.
3. Tak kalugra nginepang bangbang.
4. Desane maweh galah ring sang kalayusakaran sajeroning pitung rahina kengin atiwa-atiwa, sajawaning wenten kabuatan tios saking sang yajamana.
5. Larangan pependeman miwah palebon ring wewengkon Desa Pakraman Gunungkangin kaunggahang jeroning pararem.
6. Prade wenten kalayusekaran rikala piodalan ring kahyangan Desa, kengin mendem tan pasadok, tur patut ngrereh galah mamargi rikala wengi.

Pawos 40

1. Desa Pakraman Gunungkangin ngamanggehang indik cuntaka, mapagamel ring pamutus Mahasabha Parisadha Hindu Dharma Indonesia.
2. Tata carane nyulurang kacuntakan, mapagamel kecap sastra agama, kaanutan ring drestan Desa, sane kaingkupin jeroning pararem.
3. Sinalih tunggil Krama sane kahanan cuntaka, yan durung utas tan kalugra nyarubin genah suci druwen Desa miwah druwen sowang-sowang Krama.
4. Sang mamurug, patut keni dewa danda, prayascita sapatutnya.
5. Sengker utas cuntaka manut kawentenannya, kasulurang sakadi ring sor puniki :
 - ha. Kalayusekaran, cuntakannya kaanutang ring drestan desa miwah sastra dresta.
 - na. Ngrajaswala, cuntakannya tigang rahina ngawit saking ngrajaswala, utawi salaming ngrajaswala.
 - ca. Ngembasang putra, abulan pitung rahina ngawit saking putrane embas, ngantos katiwakin upakara / upacara tutug kambuhan.
 - ra. Karuron, cuntakannya abulan pitung rahina ngawit saking karuron, ngantos katiwakin tirta pamrayascita.
 - ka. Pawiwahan, cuntakannya ngantos sampun makalan-kalan.
 - da. Gamia gamana, cuntakannya ngantos sampun kapalasang, karuntutin antuk mrayascita sikian, Desa Pakraman miwah Kahyangan Desa.
 - ta. Salah timpal, cuntakannya kapuputang manut kecap sastra agama miwah drestan desa.
 - sa. Anak istri mobot malantaran lokika sanggraha kandugi nenten katiwakin upakara/upacara pabiakawonan, cuntakannya ngantos katiwakin upakara/upacara pabiakawonan.
 - wa. Anak istri ngembasang putra malantaran lokika sanggraha kandugi pecak nenten katiwakin upakara/upacara pabiakawonan miwah widhi widhana, cuntakannya ngantos wenten meras anake alit, karuntutin antuk upakara/upacara manut kecap sastra agama.
 - la. Sad atatayi, cuntakannya ngantos sampun mrayascita sikian miwah ngesehan prawerti.

- ma. Mamitra ngalang, cuntakannya ngantos katiwakin upakara/upacara pabiakawonan.
6. Cuntaka kalayusekaran/kapademan :
- ha. Kapendem cuntakannya :
1. Cuntaka ka Banjar, laminipun tigang rahina ngawit saking wusan mendem, ngantos sampun maprayascita (masepuh).
 2. Kulawargannya sajeroning pakarangan manut dresta.
- na. Kaabenang cuntakannya :
1. Cuntaka ka Banjar, manut dresta sane kapikukuh antuk pararem.
 2. Cuntakan sang nyambut karya pitra yajnya, manut dresta sane kapikukuh antuk pararem.
7. Sang katiben cuntaka, luwire :
- ha. Kalayusekaran sane cuntaka :
1. sang kalayusekaran.
 2. kulawargannya.
 3. bebanjarannya.
- na. Ngrajaswala, sane cuntaka : sang ngrajaswala.
- ca. Ngembasang putra, sane cuntaka : sane maderbe putra, lanang wiadin istri, utawi yayah renan sang wahu embas.
- ra. Pawiwahan, sane cuntaka : sang mawiwaha, lanang wiadin istri.
- ka. Karuron sane cuntaka : sang karuron rawuhing lanangnyane.
- da. Gamia gamana, sane cuntaka :
1. sang nglaksanayang gamia gamana;
 2. Desa adatnyane;
- ta. Salah timpal, sane cuntaka :
1. sang nglaksanayang salah timpal.
 2. Desa adatnyane
- sa. Anak istri mobot malantaran lokika sanggraha kandugi nenten katiwakin upakara/upacara pabiakawonan, sane cuntaka : anake istri sane mobot punika.

wa. Anak istri ngembasang putra malantaran lokika sanggraha kandugi pecak nenten katiwakin upakara/upacara pabiakawonan miwah widhi widhana sane cuntaka :

1. sang ngembasang putra.
2. putrane sane kaembasang

la. Mamitra ngalang, sane cuntaka : sang nglaksanayang mamitra ngalang punika.

ma. Sad atatayi, sane cuntaka : sang nglaksanayang sad atatayi punika.

8. Sang tan keneng cuntaka, luwire :

ha. Sang sulinggih.

na. Pamangku Kahyangan Tiga rikala piodalan ring pura, risampune ngalang sasih utawi ngalang tengah, kacirenin antuk atur piuning miwah nanceb penjor.

Pawos 41

1. Pamargin atiwa – tiwa utawi pangabenan kalaksanayang mapagamel kecap sastra agama miwah dresta
2. Papatusan pangabenan, kasulurang manut pararem.
3. Pangingune ring krama banjar, kasulurang manut pararem.

Palet 4

Indik Manusa Yajnya

Pawos 42

1. Krama Desa minakadi Krama Banjar, patut sareng nyanggra miwah nitenin yan wenten sinalih tunggil Krama nglaksanayang Manusa Yajnya sane mabuat.
2. Tatacara panyanggrane inucap ring ajeng kasulurang manut pararem.
3. Sang pacang nglaksanayang Manusa Yajnya sane mabuat, mangda masadok ring Prajuru.

4. Manusa Yajnya inggih punika, upacara-upacara dharmaning kahuripan manusa, ngawit saking patemoning kama bang lan kama petak sajeroning garbha, ngantos kalayusekaran ring wekas.
5. Upacara-upacara inucap ring ajeng kamargiang kanista, madhyama, utama, manut kecap sastra agama miwah dresta.

Palet 5

Indik Bhuta Yajnya

Pawos 43

1. Desa Pakraman Gunungkangin patut nyanggra pamargin Bhuta Yajnya, marep ring kabuatan Desa Pakraman Gunungkangin.
2. Pidabdab pamargin Bhuta Yajnya inucap ring ajeng, mapagamel ring kecap sastra agama, kaanutang ring drestan Desa, sane kapikukuh antuk pararem.
3. Krama Desa minakadi Krama Banjar patut sareng nyanggra sinalih tunggil krama sane nglaksanayang Bhuta Yajnya sane mabuat.
4. Sang pacang nglaksanayang Bhuta Yajnya sane mabuat, mangda masadok ring Prajuru.

Pawos 44

1. Bhuta Yajnya marep ring kabuatan Desa Pakraman minakadi carun sasih miwah sane lianan, kasulurang manut pararem.
2. Indik pamargin pamlastian utawi makiyis, kalaksanayang awarsa apisan ring segara utawi ke Ulun danu.
3. Nangken warsa rikalaning **Tilem sasih Kasanga**, patut kalaksanayang Tawur Kasanga, kalanturang antuk pangrupukan, pinaka cihna nyanggra pangrawuh Nawa Saka Warsa (Tahun Baru Saka) ring **pananggal apisan Sasih Kadasa**, sane kawastanin **Nyepi**.

4. Rikalaning Nyepi, sowang-sowang Krama Desa patut ngamargiang, **Catur Brata Panyepian**, inggih punika :
 - ha. Amati Geni : tan kengin maapi-api
 - na. Amati Karya : tan kengin nyambut karya
 - ca. Amati lelangwan : ten kengin maoneng-onengan, ngwijilang suara ghora, nabuh gegambelan, lan sakancannyane.
 - ra. Amati lelungan : tan kengin malelungayan mrika-mriki.
5. Catur Brata Panyepian punika kamargiang saking semeng jantos benjangne ngedas rahina.
6. Mangda pamargin Catur Brata Panyepian punika trepti, patut katilikin antuk tetelik Desa sane kawastanin **Pacalang Desa**, tur sang mamurug patut katiwakin pamidanda, kasulurang manut pararem.
7. Benjangne ring pananggal ping kalih sasih Kadasa, kawastanin **Ngembak Geni**, sowang-sowang krama patut saling ngaksamayang sane kawastanin Dharma Santi.

PANCAMAS SARGAH
SUKERTA TATA PAWONGAN

Palet 1

Indik Pawiwahan

Pawos 45

1. Krama Desa minakadi Krama Banjar, patut sareng nyanggra miwah nitenin sinalih tunggil krama sane nglaksanayang pawiwahan.
2. Pamargin pawiwahan, luire :
 - ha. Malantaran pepadikan.
 - na. Malantaran ngrorod utawi marangkat (ngrangkat).
 - ca. Malantaran nyentana utawi nyentana nyeburin.
3. Indik Pawiwahan, Desa Pakraman Gunungkangin ngamanggehang Undang – Undang Nomor 1 Tahun 1974, miwah Peraturan Pemerintah Nomor 9 Tahun 1975 indik Pawiwahan.
4. Tatacara penglaksanannya, mapagamel ring kecap sastra agama, kaanutan ring drestan desa sane kapikukuh jeroning pararem.
5. Sinalih tunggil krama sane pacang nglaksanayang pawiwahan mangda masadok ring prajuru

Palet 2

Indik Nyapihan

Pawos 46

1. Prajuru Desa minakadi Prajuru Banjar, wenang sareng mawosin miwah nitenin yan wenten sinalih tunggil Krama sane mapikarsa pacang palas marabi, gumanti nenten kadurusang dados nyapihan.
2. Yan Krama inucap kukuh ring pakarsannya, Desa Adat minakadi Banjar Adat, nenten sumakuta ring pamarginnya.
3. Sederenge pastika polih pamutus saking sang ngawewenang minakadi Sang Rumawos (Pengadilan Negeri), krama inucap manggeh keni tetegenan krama, sakadi nguni.

Palet 3

Indik Sentana

Pawos 47

1. Prajuru Desa minakadi Prajuru Banjar wenang sareng mawosin miwah nitenin yan wenten sinalih tunggil krama sane ngindikang sentana.
2. Indik sentana Desa Pakraman Gunungkangin ngamanggehang uger-uger jagat minakadi kawicaksanaan sang maraga Guru Wisesa, kaanutang ring drestan desa, sane kapikukuh antuk pararem.
3. Sang pacang ngrajeng sentana, mangda masadok ring Prajuru.

Palet 4

Indik Warisan

Pawos 48

1. Prajuru Desa minakadi Prajuru Banjar wenang sareng mawosin miwah nitenin yan wenten sinalih tunggil krama sane ngindikang warisan.
2. Indik warisan, Desa Pakraman Gunungkangin ngamanggehang uger-uger jagat minakadi kawicaksanaan sang maraga Guru Wisesa, kaanutang ring drestan desa sane kapikukuh antuk pararem.
3. Sang pacang ngindikang warisan, mangda masadok ring prajuru

SASTHAS SARGAH
WICARA LAN PAMIDANDA

Palet 1

Indik Wicara

Pawos 49

1. Sane wenang mawosin wicara ring wewengkon Desa Pakraman Gunungkangin inggih punika Prajuru Desa maka miwah Dulun Desa sane kawastanin Kerta Desa.
2. Prade sang mawicara tan cumpu ring Pamutus Kerta Desa, kengin nunasang ring Sang Rumawos.
3. Sahanan wicara sane mawit saking kacorahan sakaluwire sane sinanggeh nungkasin daging awig-awig, pasuara miwah pararem Desa/Banjar, patut digelis kabawosin olih Prajuru, nenten nyantos pasadok malih.
4. Sajaba wicara sakadi ring ajeng, patut nyantosin pasadok sang nunas bawos.
5. Panepase mangda nyantenang iwang patut malarapan **Tripamana**, inggih punika : saksi, likita, bukti, tur panepase tan maren nepek ring Catur Dresta.

Palet 2

Indik Pamidanda

Pawos 50

1. Desa/Banjare, wenang nibakang pamidanda ring warga Desa/Banjar sane sisip.
2. Tetibak pamidanda inucap ring ajeng, kalaksanayang olih Prajuru.
3. Bacakan pamidanda, luwire :
 - ha. Ayahan panukun kasisipan.
 - na. Artha danda saha panikelnya, miwah panikel paturunan.
 - ca. Rerampagan.
 - ra. Kanorayang.
 - ka. Kawusang makrama banjar.
 - da. Panyangaskara.

4. Pamidanda sane katiwakang, patut masor singgih, manut kasisipan.
5. Jinah utawi artabrana pamidanda, ngranjing dados druwen Desa/Banjar.

Pawos 51

1. Krama sane langkungan ring tigang paruman nglantur nenten naur paturunan miwah dedandan, wenang karampag.
2. Tetibak rerampagan, nganutin tatacara sakadi ring sor puniki :
 - ha. Kalaksanayang olih Prajuru, kasarengin antuk krama pinih akeh tigang diri, maka saksi.
 - na. Sang ngrampag patut madarsana rikala ngambil barang minakadi nyawenin tanem tuwuh, sane ageng pangargannya manut ring utang sang karampag.
 - ca. Prajuru patut miteketang mangda barang-barang sane karampag punika digelis katebus masengker awuku, tur ring kutus rahinane pacang kalelang utawi kaadol.
 - ra. Tan kengin ngrampag saluiring barang sane patut inggilang manut kecap sastra agama, miwah mademang pangupajiwane sang karampag.

Pawos 52

1. Prade sang pacang karampag mialangin pamargin rerampagan inucap, mawastu sampun tan nganutin linging awig-awig, krama inucap wenang kanorayang.
2. Yan krama inucap manggeh piwal yadiastun sajeroning makudang-kudang paruman sampun kawehin patinget sakewanten manggeh piwal, tan wenten pamargi sewos, sawawaning krama inucap kawusanang makrama Desa/banjar, tur pipil karang ayahannya kawaliang ring Desa Pakraman.
3. Rerampagan inucap ring ajeng kabawos buntas, risampun sang keni rerampagan punika :
 - ha. Nunas geng rena sinampura ring ajeng Krama Desa/Banjar, riantukan piwal ring pasubaya sane pecak sampun kararemin.
 - na. Nahur pangargan panguwak pasubaya sadaweg pacang karampag, kadulurin antuk prayascita

SAPTAMAS SARGAH
NGUWAH-UWUHIN AWIG-AWIG

Pawos 53

1. Nguwah-uwah Awig-awig desa puniki, wantah kengin kalaksanayang antuk Paruman Krama Desa.
2. Pakarsane nguwah-uwuhin punika, mangda mawit saking pakarsan Krama Desa, yadiastun kamedalang antuk sinalih tunggil Prajuru, utawi sinarengan.

Pawos 54

1. Sakaluwiring indik sane sampun kamargiang sadereng awig-awig puniki kasurat, mangda kaanutang ring sadaging awig-awig puniki.
2. Sakaluwir sane durung kasurat sajeroning awig-awig puniki, menawi kangkat kanggen mitegepin awig-awig puniki, pacang kasurat jeroning Pararem.

ASTAMAS SARGAH

SAMAPTA

Pawos 55

1. Awig-awig puniki kawastanin Awig-awig Desa Pakraman Gunungkangin.
2. Awig-awig puniki kamargiang ngawit kaingkupin utawi kareremin.

Pawos 56

1. Awig-awig puniki kararemin duk rahina **Anggara** wuku **Sinta** pananggal ping 7 sasih **Kedasa** isaka warsa **1925** tanggal **8 April 2003** magenah ring **Pura Desa**.
2. Awig-awig puniki kalinggatanganin antuk Bendesa Adat Gunungkangin, miwah olih sang ngawewenang manut kawenangannya sowang-sowang, tur kapikukuh antuk Murdhaning Pamikukuh Bupati Tabanan.
3. Luwir sang nglinggatanganin :
ha. Kapartama : Prajuru Desa Pakraman



1. Bendesa Adat Gunungkangin

IDA BAGUS MADE SUWETA

na. Kaping Kalih : Prajuru Desa Dinas maka saksi :



2. Kepala Desa Bangli,

IMADE ADIASA



1. Kelian Dinas Banjar Gunungkangin


INYOMAN KITAYASA


ca. Kaping Tiga : Kawikanin olih :


Camat Baturiti
Drs. I KOMANG ALIT SUAMBARA


Ketua PHDI Kec. Baturiti
Drs. I WAYAN PURNAYASA

ra. Kaping pat : Kapikukuh olih :

2. Kepala Kantor Departemen Agama
Kabupaten Tabanan.

Drs. I WAYAN YUDHA

1. Ketua PHDI Kabupaten Tabanan

Drs. I MADE SAMBA

**Murdhaning Pamikukuh
Bupati Tabanan**

N. ADI WIRYATAMA, S.Sos

Mengetahui dan Telah Dicatatkan :

Tanggal : 7 Januari 2004

Reg. Nomor : 189/43/HK

Kepala Bagian Hukum Kabupaten Tabanan


EGA, RUTU SUMARPATNI, SH



Desa Pakraman Gunungkangin

1. **Segi Lima Warna Hitam**
⇒ Desa Pekraman sajeroning pamargi gumanti anut ring Pancasila.
2. **Warna Dasar Putih.**
⇒ Desa Pekraman sami memangguhang kerta raharja malarapan saking kautaman Pancasila
3. **Swastika**
⇒ Sangkaning Kautaman Sinar Suci Ida Hyang Widhi, Desa Pekraman sida ngulati Tatwam Asi
4. **Pita Bawah Dengan Tulisan “ Prawireng Anor Raga”**
⇒ Sangkaning manah nirmalajati Desa Pekraman gumanti kesatria ring sajeroning nyanggra wewangunan melarapan tresna asih.
{**Prawireng** = Prawira + Ing == Kesatria, Kuat, tangguh }
{**Anor** = Ana + ur == Tresna asih, kalem,}
5. **Gunung**
⇒ Cihna pekramanne asri manut Tri Hita Karana
6. **Pintu / Candi Bentar**
⇒ Desa Pekraman prasida nerima turmaning ngelimbakang pangewruh manut tetuek Pancasila.
7. **Sayap Dan Rantai Saling Terkait**
⇒ Krama sane madue dasar pamargi sane masiosan gumanti madue tetuek turmaning ngincepang wewangunan mangda krama prasida **Gemah Ripah Lohjinawe.**
8. **Padi Dan Kapas**
⇒ Sangkaning mabuat utama ngutamayang daging utama sane wenten mangda sida ngemangguhang kasukertan.